

## **TEIMITI GENA TALOTALO**

### **Teimiti vega-matagaina**

### **kilara**

Epepa e Teimiti, Iesu tarina, na etaloato. Ia Ierusalem ekalesia kuneagina talimana ta. Epepa etaloato rigolona 45 e 49 aorai Iesu ekwaregato mulinai.

Epepa etaloato ganina:

- 1) Heberu ekalesiara vekalatovo e metau kamura gerawalirawai gaurai, aora pene vega-tiligara netiwato;
- 2) Heberu ekalesiara nunganugrai kala e maguli ati rorirorira reketa gewalawai, gaurai vogaura pene vega-rorirorira gaura pakurai;
- 3) Heberu ekalesiara pene vaikilara, kamonagi taunatauna kala namara na pene vega-matagaira.

#### **Teimiti na epepa evetaina ewareato:**

1. Kamonagi veripagani na pene kalatovoa e pene vega-matagaia (*tenu 1:1-18*)
2. Kamonagi gera inaguli e kala na pene vega-matagaia (*tenu 1:19-2:26*)
3. Kamonagi gera kila na pene vega-matagaia (*tenu 3:1-18*)
4. Kamonagi Palagu kwalanagina magulina taunatauna na pene vega-matagaia (*tenu 4:1-5:20*)

<sup>1</sup> Au Teimiti, Palagu e Velekou Iesu Keriso geria vetugunagi talimaku, gekuna epepa ewatina, gomi Israela goleana gagalana ruala (12)

tanopara polurai gotalu-lovolovona gemi ai.  
Avega-namamina.

### *Veripagani genana kamonagi pene tiliga*

<sup>2</sup> Walakavaku maparami, veripagani irauirau pio rawalira genai, tipo pio verere-agiramo. <sup>3</sup> Kwalana gomi ripami, veripagani na gemi kamonagi ekalatovoana genai, kwalimu e vevega-tiliga evega-walaana. <sup>4</sup> Gaurai kwalimu e vevega-tiliga gemi ai pene kamu taunatauna, pe gemi ai maki kepi ta ragaina pene mia e vekwakunagi ta maki ragaina, e gau kwautai ragaina pio rapu.

<sup>5</sup> Na pene gomi nunganugami ai ta ati aonekana genai, Palagu pene nogia, ia na pene venia, kwalana Palagu aona maparana mavererena na ia genogiana talimara maparara evenirana. <sup>6</sup> Na enogina genai kamonagi aimo pene nogi, ati aovoaoovona. Kwalana eaovoaoovona talimana rawapara akuna agina elavuvoana vetaina. <sup>7</sup> Votalima vetaina pene ripa, ia Velekou genana gau kwauta ati pene rawalia. <sup>8</sup> Etugamagitugamagina talimana gena inagulu mapararai ati eruga-gaugauna.

### *Lealea talimana e rinaga talimana*

<sup>9</sup> Walakava ta ati gena e ati gana ia pene verere, kwalana Palagu genai ia kamu. <sup>10</sup> E magena e magana talimana maki pene verere, Palagu na pene vetao-rigoa laganinai. Kwalana pene lekwalekwa uraura tiarera vetaira. <sup>11</sup> Garo emaragena aonai, tiavuna kukulana na gawa erala-malaiana, ne tiare na eketo-vagina, gitagitanan ralemana eaikina. Gena e gana vogovagi

talimana maki vovetaina pene lekwalekwa gena rinaga inagulura kalakalarai.

*Vekalatovo e veripagani ravana evogomaina*

<sup>12</sup> Veripagani aonai evevega-tiligana talimana pene verere, kwalana vovekalatovo pene aiki aonai, roe wapene ruga-gaugau maguli akwana pene gapia. Vomaguli Palagu na ekilagi-maavuato ia geulamagiana talimara geria. <sup>13</sup> Pene talima ta vekalatovo erawaliana aonai, ragai pene kila, “Evekalatovo Palagu genana evogomaina.” Kwalana Palagu kala rakavara na ati pene vekalatovo ripa, e ia na talima ta maki ati ekalatovoana. <sup>14</sup> Na talima ta veripagani erawaliana pene ia evaigerevagiana, ne tugamagi-rakavara na aona geganihana, geopaana. <sup>15</sup> Gena ririwa rakavara na aona gevega-vonuana, ne rakava gevega-walaana. E rakava ekamuna kwarega evega-walaana.

<sup>16</sup> Walakava namami, taa na ragai pene opami. <sup>17</sup> Veiveni gaura namara maparara e wareware rorirori gaura maparara kupa na gemarigona, Maeka Tamana, kupa maekana ekalaato Palaguna, genana emarigona. Kupa maekana eirauna, na ia ati eirauna pa mukuna na maki ati egapiana. <sup>18</sup> Ia matotauna gena ririwaimo gena kila taunatauna genana evegamagulirato, kwalana taunilimalima e gemagulina gaura reketa gimana na ekalarato gaura maparara nunganugarai pita kune gaurai.

*Kamonagi e kala*

<sup>19</sup> Walakava namami, eia pio ripaa: Gomi kwapurakwapura kila kamonagirai pio veleke,

na kilai pio kwaipo, e ragai pio paru-vailavaila.  
**20** Kwalana taunilimalima geria paru geriana Palagu gena kala rorirorira ati pia matagai.  
**21** Gaura pakurai maguli-rakavara e kala milora maparara pio piatogara. Palagu na aomi ai evaroato kilana pio gapi-ragea mamaunaumi na. Kwalana nekilana pene vega-magulimi ripa.

**22** Gena kila ragai tipo pio kamonagira, na gokamona girana kilara gemi kalai pio vega-matagaia, matotaumi irauna nogo veopana kalinana. **23** Rai Palagu gena kila tipo ekamonagiana, na kalana ati ekalaana vegitai matotauna wailana egitaana vetaina. **24** Matotauna vegitai evegitana, ne elaka-pakana aonai evetugamagi-lekwalekwana ia kolemana rakavetaina. **25** Na rai rova nama iwavagina, taunilimalima geria rakava elugavagirana rovana, egita-kalakalaana, ekamonagi-vanagivanagiana e ati ekamonagi-tegagelana, na gena kalai evega-matagaiana, ia Palagu na gena inagulu maparara aorai pene vega-namaa.

**26** Pene talima matotauna evekilagina Palagu ekwalanaana netina, na maena ati egita-tagoana, votalima matotaunamo eveopana e Palagu kwalanana kalana maki ati ganina. **27** Ita Tamara Palagu na ekalesia talimana nama iwavagina e taunataunana vovetaina etugamagiana: Gamaka e wapu geria tagitagi ai egita-tagorana e matotauna evegita-tagona tanopara milona na irauna nee vemilona.

## 2

### *Ekalesia maparara gelegelemo*

<sup>1</sup> Walakavaku maparami, gera Velekou Iesu Keriso maekana e tiavuna kamu, ia govega-taunataunaana talimami, taunilimalima maparara pio gapi-rage gelegelera, ati ira geria kolema pio gapi-ragera. <sup>2</sup> Pene talima ta, gimana makolo poevana e gena rapuga maki irau vagi, pere laka-toga gemi tanukou aonai, e ati gena e gana talimana ta gena rapuga kani kitakita pere laka-toga. <sup>3</sup> Ne gomi na rapuga maralemana ekalaana talimana pio nugagi-rage-kamua, ne pio vega-vegupua, pio vaikilaa, “Etanutanu namanai ono mai-tanu,” a ati gana e ati gena talimana pio vaikilaa, “Vonai onove ruga,” pa, “Evvatai ono mai-tanu au gageku kwalanai.” <sup>4</sup> Voia genana gomi matotaumimo govevega-irauna e veagirori maki gokalaana gemi tugamagi geriana.

<sup>5</sup> Iokamonagi, walakavaku namami, Palagu na etanoparai ati geria e ati garia talimara evirigirato, kamonagi na pia vonuvonu-rage, e gena Basileia pia gapia ulanana. VoBasileia Palagu na ekilagi-maavuato, ia geulamagiana talimaramo pia laka-toga. <sup>6</sup> Na gomi na lealea talimara gogitaguilagirana. Rai na gomi evega-rakavamina, erolo-agomina Kota kapunai? Rinaga talimara nevetaina gekalana, ei? <sup>7</sup> Ira na neara namana, gomi na govega-taunataunaana talimana arana Keriso, gekilagi-rakavaana.

<sup>8</sup> Gau namana ea: Palagu gena Basileia rovana pio kwalanaa, Puka Veaga aonai getaloato eventaina ekilana, “Lagamu talimana pono ulamagia matotaumu oveulamagina vetaina.” Neia gokwalana taunataunaana genai rorirori gokalaana.

<sup>9</sup> Na pere gomi na taunilimalima geria ver-

apuga pa raki gelegeleraimo gogapi-ragerana genai, gomi rakava gokalaana, e rova na maki evaikilamina, gomi rova gokilagi-piatogaana talimami.<sup>10</sup> Kwalana voo rai na rova maparana ekwalanaana, na kwapunamo ekala-ketoana, ia na rova maparana ekilagi-piatogaana.<sup>11</sup> Kwalana voPalagumo kwapuna ekilato, “Ragai pono mata-poraga,” maekilato, “Ragai pono vevagi.” Voia pakunai pene goi ati pono mata-poraga, na pono vevagi genai, goi rova okilagi-piatogaana tali-mamu.<sup>12</sup> Gokilana ekala gokalagirana genai, Palagu gena rova pio tugamagia, kwalana voo matiavuna taunilimalima geria rakava geriana pene luga-vagira. Voia maki pene veagirori-venimi.<sup>13</sup> Rai taunilimalima ati enugagivitirana, Palagu na maki ia ati pene nugagivitia gena Kota kamuna tomanai. Na rai taa na taunilimalima enugagivitirana, Kota kalina na ragai pene kali, kwalana venugagiviti na veagirori eiwaana.

### *Kamonagi makalana*

<sup>14</sup> Walakavaku maparami, talima ta pene kila, ia magena kamonagi, na pene gena kala na ati evega-taunataunaana genai, rakagau namana pene vega-walaa. Vokamonagi na pene vega-magulia ripa pa?<sup>15</sup> Vega-gelegelena, pere walakava ta pa walawala ta ati gena rapuga e ati gana ganigani.<sup>16</sup> Ne gomi taa na pono vaikilaa, nophonotiwa, “Maaomu namamu ono ago. Pono vekou-tali, pe ragai pene nakulamu e pono gani-mate!” Na taunipara na eririwaana gaura ati oveniana, gena nama rakagau?<sup>17</sup> Kamonagi maki vovetaina, pene kamonagi geregano mo e

kalana ati evega-matagaina genai kwaregana, ati ganina.

<sup>18</sup> Na talima ta pene kila, “Goi magemu kamonagi, na kala au geku ai.” Na au geku vega-gele eventaina, “Gemu kamonagi ana gitaa. Raka rauparai pono vega-gitaku pene kala ati evega-matagaiana genai? Na au geku kamonagi matagai, geku kala na evega-gitamuna.” <sup>19</sup> Goi na ovega-taunataunaana, Palagu kwapunamo. Nama! Na palagu rakavara na maki gevega-taunataunaana, ne gepilupiluna kwalana makalira. <sup>20</sup> Goi kawakawa! Goi oririwana ganina taunatauna ono gitaa kamonagi kala na ati evega-matagaiana ia ati ganina. <sup>21</sup> Ita tenera Aperaamo rakagu gaurai Palagu na evega-taunataunaato ia kala rorirori talimana? Ia gena kala na natuna Isaako pata veaga atanai Palagu eawarewareveniato. <sup>22</sup> Pe gogitaana, ia gena kamonagi e gena kala geinagulu-koukouto; gena kamonagi gena kala na gevega-taunataunaato. <sup>23</sup> Na Puka Veaga aonai gekilagiato kilana etaunataunato, eventaina ekilana, “Aperaamo na Palagu evega-taunataunaato, gaurai Palagu na egapi-rageato ia kala rorirori talimana.” E Palagu na maki evaikilaato, netiwato, “Au gataku.” <sup>24</sup> Gogitaana, taunilimalima gena kala na Palagu na egapi-rageana, ati gena kamonagi genanamo.

<sup>25</sup> Rahaba tauniparana evoi-agiai wavinena maki vovetaina. Ia gena kala aonana Palagu na egapi-rageato. Isaraela vegita-veakau talimara gena numai egapi-ragerato e raupara irauna na maetugu-atirato. <sup>26</sup> Vega-gelegelena taunipara ati

palaguna ia kwaregana, kamonagi maki vovetaina, pene ati kalana ia kwaregana.

## 3

### *Murumi pio gita-tagora*

<sup>1</sup> Walakavaku maparami, gomi vogo vevegaripa talimami ai ragaina pio ago. Kwalana ripami, Palagu gena Kota tomanai ia na ai, vevega-ripa talimamai, gema kala pene tavuinamainamara, ati ekalesia talimara reketa vetaira. <sup>2</sup> Ita maparara toma vogo kepi takalana. Na pene talima ta kepi ta ati ekalaana gena kilai genai, ia ati vetoukauna e tauniparana maparana pene gita-tagoa ripa. <sup>3</sup> Osi murunai egiuana aurina tatao-togaana, kwalana taririwana pene kamonagira; vovetainai tauniparana maparana pita talia ripa. <sup>4</sup> Poti iotugamagia: Kamu vagi, agi kamuna na vou ekwarivoana, na talina giringiri kekei. Votali keina kekeina na etaliana talimana gena ririwa kapura mapararai etaliagoana. <sup>5</sup> Voia gelegelenai mae makina: Kei galagala vagi, na gau kamura eveagi-agirana.

Ura maki ariglia kamuna, na kalova kiana na pene gala-gatua. <sup>6</sup> Mae maki kalova vetaina. Taunipara maparana aonai ia rakava kapuna taunipara maparana evega-miloana. Taunipara e palagura evega-rakavarana. Gera maguli rauparara maparara mae na pene vega-kepira ripa, kwalana ia kalova vetaina ita egalarana.

Vokalova egala-vanagivanagina kapuna na evogomaina. <sup>7</sup> Taunilimalima vega-maranana ripana, e gemagulina gaura irauirau maki maparara evega-maranaiana e evega-maranarawai gelegele manu, warowaro, rawapara gaura, e manega paera maki. <sup>8</sup> Na talima taa na mae rogotina ere vega-maranaa. Ia rakava e ati vega-marana venina, vevega-kwarega nanuna rakavana na evonuvonu-rageto. <sup>9</sup> Ita maera na gera Velekou e Tamara tavega-namaana, e maera na maki Palagu na ia kolemana vetaina ekalarato taunilimalimara tavega-rakavarana. <sup>10</sup> Vomuru kwapuna na vevega-nama kilara e vevegarakava kilara gelakatina. Walakavaku maparami, nekala ragai pia wala. <sup>11</sup> Puluka kwapuna na nanu mamamina e nanu mamamakina ati pia lakati, ei? <sup>12</sup> Walakavaku, figi gautupunai olive vuana ati pene tugura e olive gautupunai maki figi vuara ati pene tugu. Voia gelegelenai rama nanuna na nanumami ati pene galu-atia ripa.

### *Palagu genana evogomaina aonekana*

<sup>13</sup> Rai gomi aomi ai maaonekana e etugamagiluna? Gena maguli namara na pene vega-taunataunaa, e gena kala namara pene kalara maaonekana e mamanauna na. <sup>14</sup> Na pene gomi aomi ai velivu, paru, e veagi gemiana genai, ragai pio kila, “Ai maaonekamai!” Voiana gomi na kila taunatauna gotao-togaana. <sup>15</sup> Ne aoneka ati kupa na pa Palagu genana gemarigona, na ia tanopara gena, taunilimalima aora na

gemaragena e palagu rakavara geriana gevogomaina. <sup>16</sup> Kwalana munemune e veagi gemiana kapura aovoaovo emiana, e kala rakavara maparara maki gemiana. <sup>17</sup> Na kupana evogomaina aonekana ati milona e ati vekwakunagina ta. Pene gapi-ragea talimana gena kala voa: Maino, karo nama, vegata. Ia magena venugagiviti e vuavuana maki namara. Kila opakau e kala opakau ati ripana. <sup>18</sup> Maino ai gemagulina talimara noowane varovaro uvera gevarorana vetaina. Maino na kala namara vogo evegawalarana. Vokala namara taunilimalima geria maguli ai gematagaina noowane ginaroginaro (kuakua) tomanai gau namara gerawalirana vetaina.

## 4

### *Tanopara Vegatana*

<sup>1</sup> Vevagi e kogo gomi nugarugami ai rakagauna gevega-walarana? Ne gemi ririwa rakavara aomi ai matotauria kwapurakwapura gevevagina geriana gevogomaina. <sup>2</sup> Gau reketa goririwana, na ati gogapirana, ne govagivagina. Gau reketa goririwa-rakavarana, na ati gorawalirana, ne gokogona e govevagina. Goririwarana gaura ati gorawalirana, kwalana Palagu ati gonogiana gaurai. <sup>3</sup> E gonoginogina maki ati gorawalina, kwalana gemi tugamagi rakava; goririwana rakagau gonogirana gaura geregami na pio gaunara.

<sup>4</sup> Gomi mata-poraga talimami, (Palagu genana gogerevagito talimami)! Gomi ati ripami tanopara ria pogo vegata Palagu ati pogo ririwaa?

Rai eririwana tanopara goti pia vegata netina talimana na Palagu evetali-veniana.<sup>5</sup> Puka Veaga aonai kila ta evetaina ekilana, “Palagu na ita aorai etaoato Veaga Palaguna eririwa-rakavana, ia na pene kune-agira.” Gomi gotugamagina vokila getalo-kawaato?

<sup>6</sup> Na Palagu gena vega-nama kamu ita gerai. Voia pakunai gena Puka Veaga aonai evetaina ekilana, “Eveagina talimana Palagu na etao-gerevagiana, e manau talimana gena vega-nama eveniana.”

<sup>7</sup> Gaura pakurai pio vevega-manau, Palagu kapulenai pio maguli. Satani pio vega-waia, ne gemi na pene laka-vagi. <sup>8</sup> Palagu genai pio laka-kavi, ne ia maki gomi gemi ai pene laka-kavi. Gimami pio guligira, gomi rakava talimami! Aomi pio alevara gomi tugamagi-opakau talimami! <sup>9</sup> Pio aovitiviti, pio tagi e pio wanono. Gemi mamai aovitiviti ai pene ago, e gemi verere aometau ai pene ago!<sup>10</sup> Velekou wailanai pio tiu-tali, ne ia na pene gapitimi.

### *Ragai pio vekilagi-rakava*

<sup>11</sup> Walakavaku maparami, gomi kwapurak-wapura ragai pio vekilagi-rakava. Rai na walakava ta ekilagi-rakavaana pa eagiroriana ia Palagu gena rova ekilagi-rakavaana e veagirori ekalaana. Pene goi na rova oagiroriana genai, goi na ati okwalanaana, na veagirori talimanai oagona. <sup>12</sup> Palagu geregano rova etugu-rigona e veagirori talimana. Ia geregano matiavuna pene vevega-maguli e pene vevega-rakava. Goi rai, gaurai lagamu talimana oagiroriana?

*Ragai pono veagi pa veveagoloka*

<sup>13</sup> Iokamonagi, nee raira nevetaina gokilana, “Toma pa pogipogi ita pita ago etaoni pa votaoni ai. Vonai rigolo kwapuna pita talu, pitineti pita kala, moni galagala-vagi pita rawalira.” <sup>14</sup> Gomi ati ripami gemi maguli pogipogi raka peneve mia-tiwa. Gomi gemi maguli rakagau? Gomi kovu vetaina, elakati-vegalapoluna veganamo, ne maelekwalekwana. <sup>15</sup> Gomi evetaina pogoro kila, “Pene Velekou pene ririwa genai pita maguli e evetaina pa vovetaina pita kala.” <sup>16</sup> Na gomi govevega-ragena e goveagina; vovetaira vevegaragera rakava, ati nama.

<sup>17</sup> Gaura pakurai, rai talima ripana, ia na kala namana pere kalaa gauna, na ati ekalaana genai, ia kala rakava talimana.

## 5

*Rinaga talimami rogom i pio vetole*

<sup>1</sup> Magemi rinaga vogo talimami, iokamonagi! Pio tagi, pio tagi kogokogo, kwalana viti ati keikeina gemi ai evogomaina. <sup>2</sup> Gemi rinaga maparara pege poraga, e gemi rapuga palo na pege ganira. <sup>3</sup> Gemi kolo e gemi siliva pege kalokalo. Vokalokalona gomi pene kilagi-atimi, e virigomi pene ganira kalova vetaina. Etoma ikara ularana gemi rinaga gottenurato. <sup>4</sup> Iokamonagi, gemi aragai geinaguluto talimara gomi na voira ati govenirato. Geria aovitiviti iokamonagia! Gemi ganigani getenu-kourato talimara geria tagi warauna Goloka-iwa Velekouna na peve kamonagia. <sup>5</sup> Gomi gemi maguli etanoparai rinaga e

verere aorai, e gogoregala-rakavana. Pio gani-mate e pio kopa-gulu, vagivagimi tomania warau pekware. <sup>6</sup> Gomi na ati geria rakava talimara goagirori kawarato e govagi-kawaregarato, ira na ati gekala-wainagimoto.

### *Vaigaoka e rapali*

<sup>7</sup> Walakavaku maparami, pio vaigoaka pene ago neamo, Velekou pene vogomai. Araga talimana iogitaa, evealona, gena aragai varovaro gaura ganira namara ealorana, evaigaokana pene ago, gaulago e gaukala gurana pene ketokaua. <sup>8</sup> Gomi maki pio vaigaoka. Aomi pia tiliga, kwalana Velekou gena vogomai maki warau pekavinagi.

<sup>9</sup> Walakavaku maparami, matotaumi nunganugami ai ragai pio veagirori, Palagu na irauna ne agirorimina nea. Iokamonagi, Kota ekamonagina talimana warau vanagi ai eruga-tagona. <sup>10</sup> Walakavaku maparami, Velekou aranai gekilawai peroveta talimara iotugamagira. Geria vitiviti aorai gevaigaokawai. Gomi maki vovetaina pio vaigaoka. <sup>11</sup> Gogitaana, ita na tavega-ragerana, kwalana gevaigaokato gaurai. Iobu gena vaigaoka valina gokamonagiato, gomi ripami, Velekou na ikanai raka evega-nama-tiwaato, kwalana Velekou gena ulamagi e gena venugagiviti kamu iwavagi.

<sup>12</sup> Walakavaku maparami, gau kamu iwavagina ea: Kila gaokarana ragai pono kila-gavu gemi kila vega-taunataunara ulanana. Kupa pa

tanopara pa gau poluna ta aranai ragai pono kilagavu. Pene “Pa” nogotina genai, paamo nopo-otiwa, a “Aikina” nogotina genai maki, aikinamo nopo-otiwa. Vovetainai Palagu na ragai pene vaikilami gomi kepi.

### *Kila matiavuna*

<sup>13</sup> Gomi nuganugami ai ta evitivitina pa? Pene rapali. Ta evererena pa? Palagu vega-ragena marira pene gapi. <sup>14</sup> Ta evitiana pa? Ia eklesia gekune-agiana talimara pene vetugu-agira, pia mai-rapali ia atanai e rigana pia mai-rigaa Velekou aranai. <sup>15</sup> Rapali makamonagira ria genai, viti talimana pene nama. Palagu na gena viti pene vega-namaa, e rakava ekalato genai, gena rakava pene tugamagi-piatogara. <sup>16</sup> Voia pakunai, gemi rakava taukavami kwapurakwawapura geriai pio kilagi-matagaira, e kwapurakwawapura geriai pio rapali, pe gemi viti na pio nama. Palagu gena ririwa ekalarana talimana gena rapali tiavu vagi. <sup>17</sup> Elia taunilimalima ita vetaira. Ia erapali-tiligatiligato gura ragai pene keto ulanana, ne tanoparai gura rigolo toitoi e uve taula toitoi ati eketoto. <sup>18</sup> Maerapali-waito, ne kupa evekala-pakato, gura maeketoto; ne kwanona ganigani maevega-walaato.

<sup>19</sup> Walakavaku maparami, pene gomi ta Palagu gena kila taunatauna aonana pene laka-gerevagi, nee taa na mapene vevaiwaikulea genai, kala namana ekalaana. <sup>20</sup> Pio ripa, rai na kala rakava talimana gena raupara leana evaiwaikuleana genai, ia na voo kala rakava talimana palaguna kwarega

aona na evega-maguliana, e rakava vogó maki  
Palagu na etugamagi-piatogarana.

**VEKAPAWAI VALIGUNA  
The New Testament in the Kalo Dialect of the Keapara  
Language of Papua New Guinea  
Nupela Testamen long tokples Kalo long Niugini**

Copyright © 2005 The Bible Society of Papua New Guinea

Language: Kalo (Keapara) (Keapara)

Dialect: Kalo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-18

---

PDF generated using Haiola and XeLaTeX on 11 Nov 2022 from source files dated 9 Oct 2020

0d2a28c6-23b2-5919-8f17-cadd5635ef22